

Malamalama i le Autaunonofo

O Autaunonofo

“Na talitonu le Au Paia o Aso e Gata Ai o le faaiipoipoga o le alii e toatasi i le tamaitai e toatasi o le tulafono autu lea a le Alii o le faaiipoipoga. I taimi o le Tusi Paia, na poloaiina e le Alii nisi e faatino le autaunonofo—le faaiipoipoga o le alii e toatasi i tamaitai e sili atu ma le toatasi. E ala mai le faaaliga, na poloaiina e le Alii Iosefa Samita e faatuina le faiga o autaunonofo i tagata o le Ekalesia i le amataga o le 1840. Mo le silia ma le afa seneturi, na faia ai e nisi o le Au Paia ia autaunonofo i lalo o le taitaiga a le Peresitene o le Ekalesia” (“Plural Marriage in The Church of Jesus Christ of Latter-day Saints,” Gospel Topics, [lds.org/topics](https://www.lds.org/topics)).

O se Poloaiiga Faigata

Eliza R. Snow (1804–87), o le peresitene aoao lona lua o le Aualofa, na faamauina i le Perofeta o Iosefa Samita. Na ia faamaumuina le aafiaga lenei lea na aoao atu e le Perofeta o Iosefa i le aoaoga faavae o le autaunonofo i lona tuagane o Lorenzo Snow.

“O le Perofeta o Iosefa na tatala atu lona loto [ia Lorenzo Snow], ma faamatala i ai le suega faalemafau faigata na ia oo i ai i le foiaina ma le tete e ona lagona, o le taunuuga masani o le malosiaga faaleaoaoga ma tu faaagafesootai, e tusa ai ma le faailoaina mai o le autaunonofo. Na ia silafia le siufofoga o le Atua—na ia iloa le poloaiiga a le Silisiliese ia te ia o le agai i luma—ma fai le faataitaiga, ma faatuina le autaunonofo faaSelesitila. Na ia iloa e le gata sa i ai ona lava le atoatoa ma uluai malamalama e tatau ona foia ma faatoilalo, ae o i latou o le lalolagi atoa o Kerisiano e faasagatau mai ia te ia; ae o le Atua, e sili atu i se isi, na tuuina mai le poloaiiga, ma e tatau ona usitaia e la. Ae na faatuai le Perofeta ma na tolopoina mai lea taimi i lea taimi, seia oo ina tu mai se agelu a le Atua ia te ia ma se pelu ua sei, ma tau atu ia te ia, sei vagana ua ia agai i luma ma faatuina le autaunonofo, o le a aveesea lona Perisitua mai ia te ia ma o le a faaumatia o ia! O lenei molimau e le na o lona tuagane na ia tuuina atu i ai, ae o isi foi—o se molimau e le mafai ona le amanaiaina [teteina]” (*Biography and Family Record of Lorenzo Snow* [1884], 69–70).

O Se Suega o le Faatuatua

O le toatele na tauivi ma le mataupu faavae o le autaunonofo na faamanuiaina i se molimau faaleagaga i le moni o le mataupu faavae.

“E tusa ai ma le saunoaga a Helen Mar Kimball, ‘o le faatinoina o lenei mataupu faavae o se suega e sili le faigata o le a sueina ai le Au Paia i lo latou faatuatua.’ E ui lava o se tasi o suega ‘sili ona matuia’ o lona olaga, na ia molimau mai faapea na avea foi o se ‘tasi o faamanuiaga silisili.’ . . .

“Na manatua e Lucy Walker lona faaletonu i totonu ina ua valaaulia o ia e Iosefa Samita e avea ma ana ava. ‘O lagona uma o lou agaga na inoino atu i ai,’ na ia tusia. Ae, ina ua mavae ni nai po o le le moe ae tatalo i tulivae, na ia maua se faamama avega ao ‘faatumuina lona potu i se faatosinaga paia’ e pei o se ‘la susulu malosi.’ Na ia faapea mai, ‘Na tumu lou agaga i se filemu mafanafana matagofie ou te lei iloina muamua lava,’ ma ‘na lagona uma e lou tino le olioli mamana’” (“Plural Marriage in Kirtland and Nauvoo,” Gospel Topics, [lds.org/topics](https://www.lds.org/topics)).

Iosefa Samita ma le Autaunonofo

E toatele tamaitai na faamauina ia Iosefa Samita, ae e le o iloina le aofai sao.

“I le vaitau lea na faia ai autaunonofo, na iloa ai e le Au Paia o Aso e Gata Ai le eseese i le va o faamauga mo le taimi nei ma le faavavau ma faamauga mo na o le faavavau. O faamauga mo le taimi nei ma le faavavau na aofia ai tautinoga ma faia i lenei olaga, e masani lava ona aofia ai le i ai o faia faalefeusuaiga. O faamauga mo-na o le faavavau na tau mai ai le sootaga i le na o le isi olaga.

“. . . O nisi o tamaitai na faamau ia Iosefa Samita na molimau mai mulimuli ane o a latou faaiipoipoga sa mo le taimi nei ma le faavavau, ao isi na tau mai o a latou sootaga sa na o le faavavau lava.

“O le toatele na faamau ia Iosefa Samita na i le va o le 20 ma le 40 tausaga i le taimi o la latou faamauga ia te ia. O le sa sili le matua, o Fanny Young, sa 56 tausaga le matua. O le sa sili ona laitiiti o Helen Mar Kimball, . . . lea na faamau ia Iosefa ini nai masina ae lei oo i lona aso fanau lona 15. O le faaiipoipoga i lona tausaga, e le talafeagai i tulaga o aso nei, sa aloaia i lona vaitau, ma o nisi tamaitai na faaiipoipo i le ogatotonu o o latou tai-sefulu ma ona tupu tausaga. Na saunoa Helen Mar Kimball i lona faamauga ia Iosefa o le ‘mo na o le faavavau,’ ma taua ai faapea o le sootaga e lei aofia ai ni faiga faalefeusuaiga. . . .

“. . . Na faamauina Iosefa Samita i ni tamaitai ua uma ona faaiipoipo. E leai nisi o nei tamaitai po o Iosefa Samita na faamatalaina tele nei faamauga, e ui o ni nai tamaitai na faapea mai sa na o mo le faavavau lava. O isi tamaitai e lei tuua ni faamaumuina, ua le iloa ai pe o a latou faamauga na mo le taimi nei ma le faavavau pe na o mo le faavavau lava.

“E i ai ni nai faamatalaga talafeagai mo lenei faiga. O nei faamauga atonu na saunia ai se auala e fatu ai le sootaga e faavavau pe sosoo ai le va o le aiga o Iosefa ma isi aiga i totonu o le Ekalesia. O nei sootaga na faalatele sao atu i luga, mai matua i le tamaitiiti, ma faalava, mai se tasi o le aiga i le isi. I le aso o ia sootaga faavavau e ausia e ala atu i faaiipoipoga

i le malumalu o tagata e faamauina i o latou lava aiga moni, i lenei auala ua sosoo ai aiga faatasi” (“Plural Marriage in Kirtland and Nauvoo,” Gospel Topics, [lds.org/topics](https://www.lds.org/topics)).

Ina ua mavae atu le maliu o le Perofeta, e toatele tamaitai na faamau ia te ia o e e lei i ai se sootaga faalelalogi ma ia.

Faafeagai i Autaunonofo

E toatele taitai faalelotu ma le malo i le lunaite Setete na tetei i le faiga o autaunonofo, lea na latou manatu e leaga ma faatuapua. Na faitioina le Au Paia o Aso e Gata Ai i lauga faalauaitele, tusi, mekasini, ma nusipepa. Na pasia e le Palemene o le lunaite Setete tulafono e faatapulaa ai le saolotoga o tagata o le Ekalesia ma faaleaga ai le Ekalesia i tulaga tautupe i le faatapulaa ina lea o meatotino e mafai ona umia e le Ekalesia. “O lenei tulafono na mafua ai ona ave faapagota ma faafalepuipui ai e leoleo alii e sili atu ma le tasi a latou ava ma aveese mai ia i latou le aia tatau e palota ai, le aia o le nofo saoloto i o latou aiga, ma le fiafia i isi saolotoga faletagatanuu” (*O lo Tatou Tupuaga: O se Talafaasolopito Ootoo o le Ekalesia a Iesu Keriso o le Au Paia o Aso e Gata Ai* [1996], 101). I le 1890, e faitau selau le Au Paia o Aso e Gata Ai faatuatua na auauna atu i le falepuipui. O isi na sosola ma lalafi e aloese ai mai le faafalepuipuiina. I nei tulaga, e tele aiga na puapuagatia mai le faanoanoa, faavauvau, mativa, ma le fiaaai.

E ui ina ulagia i latou mo le faia o autaunonofo, e toatele le Au Paia o Aso e Gata Ai na puipuia le faatinoga ma molimau atu na latou iloa ina na faaalai mai e le Atua i le Perofeta o Iosefa Samita.

O nei tulaga faigata na taitai atu ai Peresitene Uilifoti Uutilafi e saili i le agaga tatalo le taitaiga a le Alii e tusa ai ma le faatinoina e le Au Paia o le autaunonofo. I le 1889, na faatonuina ai e Peresitene Uutilafi taitai o le Ekalesia e faamuta le aoaoina o le mataupu faavae o le autaunonofo. I le 1890, na itiiti lava ni nai autaunonofo na faatinoina, ae o nei faiga na faia e faasaga i le fautuaga a Peresitene Uutilafi. Ae ui i lea, o nisi tagata na lolomiina ni lipoti faapea o loo faia pea e le Ekalesia le faatinoina o le autaunonofo. O nei lipoti na faateleina ai le tetei agai i le Ekalesia. Ia Setema 1890, na tuuina atu ai e Peresitene Uutilafi se Manifesto, lea ua iloa ina nei o le Folafolaga Aloaia 1 i le Mataupu Faavae ma Feagaiga.

O Le Manifesto Lona Lua

“O le Manifesto [Folafolaga Aloaia 1 na folafofa atu ai e Peresitene [Uilifoti] Uutilafi lona manao e usitai i tulafono o le lunaite Setete. E lei taua ai lava tulafono a isi atunuu. Talu mai lava le tatalaina o kolone i Mekisiko ma Kanata, na faia e taitai o le Ekalesia ia autaunonofo i na atunuu, ma ina ua mavae Oketopa 1890, na faaauau ona faatino ma le filemu autaunonofo iina. . . . I lalo o tulaga faapitoa, na o ni nai autaunonofo na faatino i le lunaite Setete i le va o le 1890 ma le 1904, e ui e leo manino pe na faatagaina le faia o ia faaiipoipoga i totonu o setete” (“The Manifesto and the End of Plural Marriage,” Gospel Topics, [lds.org/topics](https://www.lds.org/topics)).

I le konafesi aoao o Aperila 1904, na tuuina atu ai e Peresitene [Iosefa F.] Samita se saunoaga malosia, ua iloa ina o le Manifesto Lona Lua, ua faasalaina ai autaunonofo i le tapeina o igoa” (“Plural Marriage in The Church of Jesus Christ of Latter-day Saints,” Gospel Topics, [lds.org/topics](https://www.lds.org/topics)).

